



10. marts 2020

UKA 2020/90

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Timersorneq pillugu inatsimmi<sup>1</sup> e-sport timi atorlugu timersuutitut allatuulli akuerisaanissaa pillugu Naalackersuisut inatsimmut allanguutissatut siunnersuuteqaqqullugit peqquneqarnissaannik Inatsisartut aalajangiiffissaattut siunnersuut.**

(Inatsisartunut ilaasortaq, Aqqalu C. Jerimiassen, Atassut)

### **Tungavilersuut**

Fortnite, Fifa, Call of Duty, Tekken il.il. tassaapput spillit nunarsuarmi unammissutaasartut pimoorunneqarlutillu aallunneqartut. Taakkulu e-sportinik taaneqartarput, pisortatigoortumillu timersuutitut allatulli unammissutigineqartarlutik.

Nunatsinni timersornikkut peqatigiiffiit kattuffiillu tapersersorneqartarput, unammiarnissaminnulla taperneqarsinnaasarlutik. Taamatullu e-sport-i pisortatigoortumik timersoriaatsit akuerineqarnissaa ammaffigisariaqarparput, erfalaspullu atorlugu pikkorissortagut unammiartissinnaanngortittariaqarlugit. Massakkulli inatsit malillugu taamaallaat unammiaarutit timikkut aalluttakkat akuerisaasutut inissisimapput<sup>2</sup>.

Spillertarneq nalinginnaasumik sunngiffimmi nuannisaarutaannaasaraluartoq meeqqat inuusuttullu akornanni, massakkut pimoorunneqarnerullunilu aningaasarpassuarnik naleqalernikuuvoq, pikkorinnerpaanullu inuussutissarsiuutaasalersimalluni. Taakkunanilu pikkorinnerpaat inuussutissarsiuutiginnaalluarpaat nunanut allanut unammiarsinnaallutik erfalorput atorlugu. Isumaqarpugullu taakku tapersersornerusinnaagigut, soorlu peqatigiiffeqarnikkut, nunanullu allanut unammiartornikkut, aatsaallu pisortatigoortumik akuerineqareeriarpata.

Timersuutitut akuerineqalernera imminik e-sport nunatsinni siammarnelertinnaviangilaa, aamma toqqaannartumik nunatta unammissartussaannik pilersitsissutiginaaviangilaa. Akuerineqarnerali alloriarnerusaaq siulleq, gamer-it hold-tut peqatigiiffinnilu kattussuutilernissaannut.

Nunatsinni siammasissumik piginnaasagut pikkoriffigullu atorsinnaasariaqaratsigit Inatsisartuni esport qaqipparput.

---

<sup>1</sup> Timersorneq timigissarnerlu pillugit Inatsisartut inatsisaat nr. 15, 6. juni 2016-imeersoq

<sup>2</sup> Timersorneq pillugu inatsisip § 2: "Inatsimmi matumani timersorneq tassaavoq timigissarniarluni aamma peqqissarniarluni timi atorlugu sammisaqarneq."



**Aningaatigut ingerlatsinikkullu pisortanut kingunerisassai:**

Inatsimmut annikitsumik allangortitsinissaq uani pineqarpoq. Naatsorsuutigineqassaarlut annerpaamik AC-fuldmægtigep ukiup affaanik sulineranik naleqassasoq.

E-sport politikikkut pisortatigoortumik inatsisit malillugit timersuutitut akuerineqarneratigut aningaasatigut taperneqarsinnaangornissamut periarfissat ammanerulissapput. Aningaat timersornermut immikkoortinneqarsimasut amerleriartinneqanngippata kingunerisinnaavaa massakut taakku aningaasat amerlanerusuniit agguataarneqartalissasut. Tamannalu ersarinnerusumik naatsorsorneqarsinnaangikkallarpoq apeqqutaassammat qanoq qinnuteqartoqartassanersoq.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.